

Tabell 3-k

Anslag på frie inntekter i 2018 for kommunane

Tabell 3 viser anslag på vekst i frie inntekter for kommunane frå 2017 til 2018. Som frie inntekter reknar ein skatt på inntekt og formue (inkl. naturressursskatt) og rammetilskot. Tabellen viser veksten etter anslag på rekneskap for 2017. Alle tala er i nominelle kroner. Prisveksten i kommunesektoren i 2017–2018 er anslått til 2,6 pst.

Skatteinntektene, inkl. skatteutjamning, er den storleiken det er knytt mest uvisse til i veksten i frie inntekter. Samla skatteinntekter for kommunane i 2017 og 2018 blir anslått av Finansdepartementet i Statsbudsjettet 2018. For å anslå skatteinntektene for kvar kommune tek ein utgangspunkt i skatt per innbyggjar i kommunen i 2016, framskrive med innbyggjartalet i 2017. Ut ifrå skatt 2016 framskriven med innbyggjartal for 2017, blir det rekna ut kva del som kvar kommune får av berekna samla skatt. Den delen blir vidare nytta til å fordele samla skatteanslag på inntekt og formue mellom kommunane både for 2017 og 2018.

Anslag på skatteutjamning er inkludert i skatteanslaget. For 2017 og 2018 er utjamninga i skatteinntektene for kommunane 60 prosent. Kommunar med skatteinntekter under 90 pst. av landsgjennomsnittet får ein tilleggskompensasjon som blir finansiert av alle kommunar med eit likt trekk per innbyggjar. I utrekninga blir naturressursskatten halden konstant, med tal frå inntektsåret 2015.

Tala for rammetilskot 2017 er henta frå Revidert nasjonalbudsjett 2017.

Veksten i frie inntekter frå 2017 til 2018 blir berekna frå anslag på rekneskap for 2017 i Statsbudsjettet 2018. Skatteinntektene for kommunane i 2018 er anslått til 164,6 mrd. kroner, inkludert både skatt på inntekt og formue og eigedomsskatt o.a. Inntektsveksten frå 2017 til 2018, ut ifrå anslag på rekneskap, er nominelt 2,6 pst. Dette anslaget inkluderer ei oppjustering av skatteanslaget for kommunane for 2017 med 3,365 mrd. kroner samanlikna med anslaget i Revidert nasjonalbudsjett 2017. I tabellen er eigedomsskatt o.a. ikkje inkludert for kvar einskilde kommune og summert for fylke, men inngår berre på landsnivå.

Rammetilskotet for 2018 er vist i tabell 1-k. Dei kommunevise anslaga på frie inntekter i 2017 og 2018 inkluderer ikkje tilbakehalde skjøn. Tilbakehalde skjøn kjem i tabell 3-k fram som ufordelte midlar for alle fylke. Den berekna veksten på fylkesnivå inkluderer difor nivåa på tilbakehalde skjøn i 2017 og 2018, medan dette ikkje er tilfelle på kommunenivå.

For 2017 var midlar til overgangsordninga for kommunar som skal slå seg saman ein del av ufordelt skjøn i Grønt hefte. Midlar til overgangsordninga er i 2018 fordelt på kommunenivå i tabell C. For å gjere berekninga for 2017 og 2018 mest mogleg samanliknbar, noko som er ein føresetnad for å kunne berekne veksten, er midlar til overgangsordninga i 2017 handsama som om ho óg var i tabell C i 2017. Midlar til overgangsordninga er såleis fordelte på kommunar både i 2017 og 2018.

For å gjere tala samanliknbare blir frie inntekter for 2017 korrigererte for eventuelle oppgåveendringar, regelendringar og innlemmingar av øyremerkte tilskot i 2018. I 2018 er summen av desse endringane -285,1 mill. kroner. Korreksjonane i 2018 er viste i innleiinga til Grønt hefte. Korreksjonar på kommunenivå er i hovudsak gjort etter kostnadsnøkkelen. For forsøk med statlig finansiering av omsorgstenesta er korreksjonen berekna etter fordelinga i tabell C i 2018.

På kommunenivå er det óg gjort korreksjonar for endra fordeling mellom kommunane for helsestasjons-/skulehelsetenesta og frivilligsentralar. For frivilligsentralar er det teke utgangspunkt i omfordelinga innanfor innlemma beløp frå 2017. Satsingar innanfor veksten i frie inntekter utover dette er det ikkje korrigerert for. Korreksjon i skjønstilskotet for plassar til einslege mindreårige flyktningar som ikkje blei teke i bruk (eingongsbevilgning i 2017) er berre gjort på landsnivå, ikkje for kvar einsskilde kommune.

Veksten i frie inntekter frå 2017 til 2018 blir berekna frå anslag på rekneskap for 2017. Inntektsveksten frå 2017 til 2018, rekna frå anslag på rekneskap, er nominelt 2,6 prosent.

Kolonne 1 – Anslag på frie inntekter i 2017

Kolonne 1 viser anslag på rekneskap for frie inntekter i 2017. Anslag på rammetilskotet til kommunane, eksklusive skatteutjamning, er henta frå Revidert nasjonalbudsjett2017. Skatteinntektene er framskrivne i samsvar med skatteanslaget for 2017 i Statsbudsjettet 2018, med lik vekst for alle kommunar. Dette anslaget inkluderer ei oppjustering av skatteanslaget for 2017 med 3,365 mrd. kroner.

Kolonne 2 – Anslag på oppgåvekorrigererte frie inntekter i 2017

Inntektene i kolonne 2 er anslag på rekneskap korrigerert for oppgåveendringar, regelendringar og innlemming av øyremerkte tilskot. Det er teke utgangspunkt i det same anslaget som i kolonne 1. Oppgåveendringane det er korrigererte for er omtalt nærare i tabell B-k og C-k.

Kolonne 3 – Anslag på frie inntekter i 2018

Kolonne 3 viser anslag på frie inntekter i 2018. Anslag på rammetilskotet til kommunane, eksklusive skatteutjamning, er henta frå kolonne 7 i tabell 1-k. Ved berekninga av anslaget på skatteinntektene til kommunane, har departementet teke utgangspunkt i kommunane sine skatteinntekter i 2016. Desse er framskrivne i samsvar med skatteanslaget for 2017 og 2018 i Statsbudsjettet 2018. Skatteanslaget for kvar kommune er deretter lagt til grunn for utrekninga av skatteutjamninga.

Kolonne 4 – Anslag på korrigerert vekst frå 2017 til 2018

Kolonne 4 viser anslag på oppgåvekorrigerert vekst i frie inntekter frå anslag på rekneskap 2017 til 2018 for kvar kommune i 1 000 kroner (kol. 3 – kol. 2).

Kolonne 5 – Anslag på korrigerert vekst i prosent frå 2017 til 2018

Kolonne 5 viser prosentvis oppgåvekorrigerert vekst frå anslag på rekneskap 2017 til 2018.